

Dumonda Kaiser concernent il svilup da las tariffas da las canortas en il chantun Grischun

Dapi il 1. d'avust 2025 è en vigur il nov subvenziunament per purschidas renconuschidas da la tgira d'uffants complementara a la famiglia. La Lescha davart la promoziun da la tgira d'uffants complementara a la famiglia ch'è vegnida concludida il december 2022 ha la finamira da rinforzar la cumpatibilità da la famiglia, da l'actività da gudogn e da la scolaziun e da reducir la cumpart da las famiglias als custs totals.

I sa mussa che divers geniturs en il chantun Grischun ston da nov schizunt pajar dapli che fin ussa. Il motiv per quai è l'adattaziun da las tariffas dals singuls portaders da canortas d'uffants. En spezial tar uffants sut 18 mais èn las tariffas creschidas massivamain (per part quasi sa dublegiadas). Ils custs normads fixads dal chantun na paran betg da cuvrir ils custs che resultan per las canortas, uschia ch'ellas ston metter a quint custs supplementars e pia betg subvenziunads. Betg mo famiglias èn confruntadas cun dischavantatgs, er las canortas d'uffants rapportan da problems. Intgins portaders rapportan schizunt da retratgas pervia da la grevizza finanziaria supplementara. Uschia na cuntanscha la lescha betg l'effect giavischè e manchenta la finamira d'ina purschida attractiva da la tgira d'uffants complementara a la famiglia.

La risposta da la Regenza a la dumonda Schneider a chaschun da l'ura da dumondas en la sessiun d'avust 2025 na cuntenta betg: Il Cussegl grond dovra uschè svelt sco pussaivel datas expressivas per pudair instradar eventualas adattaziuns.

Perquai vulain nus dumandar la Regenza:

1. Quantas famiglias profitan da la midada dal sistem e quantas famiglias èn confruntadas cun custs tuttina auts e pli auts?
2. Tge mesiras èn necessarias per cuntanscher l'effect giavischè e per distgargiar substanzialmain la gronda part da las famiglias ed uschia cuntanscher la finamira da la lescha?
3. Prenda il chantun en egl eventualas correcturas per garantir la finamira oriunda da la lescha? Sche gea, fin cura?

Cuira, ils 30 d'avust 2025

Kaiser, Stiffler, Schneider, Altmann, Atanes, Bachmann, Bardill, Baselgia, Bavier, Berweger, Biert, Bischof, Bisculm Jörg, Bluvol, Cahenzli-Philipp, Casale, Censi, Cola, Das, Della Cà, Dietrich, Gartmann-Albin, Hoch, Hofmann, Holzinger-Loretz, Horrer, Jochum, Kreiliger, Mazzetta, Mittner, Müller, Nicolay, Preisig, Rageth, Rusch Nigg, Rutishauser, Saratz Cazin, Schläpfer, von Tscharnier, Zanetti (Landquart), Zaugg-Ettlin, Zindel